

唐
大 唐 創 業 起 居 注
鑑 附考異 (一)



乙
1771

大唐創業起居注

溫大雅
撰

中華書局

大唐創業起居注

叢書集成初編所選唐宋叢
書津逮秘書及秘書二十一
種學津討原皆收有此書唐
宋津逮兩本在前津逮本較
佳故據以排印

大唐創業起居注卷一

唐陝東道大行臺工部尙書上柱國樂平郡開國公臣溫大雅撰

起義旗至發引凡四十八日

初帝自衛尉卿轉右驍衛將軍奉詔爲太原道安撫大使郡文武官治能不稱職者並委帝黜陟選補焉河東已來兵馬仍令帝徵發討捕所部盜賊隋大業十二年煬帝之幸樓煩時也帝以太原黎庶陶唐舊民奉使安撫不踰本封因私喜此行以爲天授所經之處示以寬仁賢智歸心有如影響煬帝自樓煩遠至鴈門爲突厥始畢所圍事甚平城之急賴太原兵馬及帝所徵兵聲勢繼進故得解圍僅而獲免遂向東都仍幸江都宮以帝地居外戚赴難應機乃詔帝率太原部兵馬與馬邑郡守王仁恭北備邊朔帝不得已而行竊謂人曰匈奴爲害自古患之周秦及漢魏歷代所不能攘相爲勍敵者也今上甚憚塞虜遠適江濱反者多于蝦毛羣盜所在蜂起以此擊胡將求以濟天其或者殆以俾余我當用長策以馭之和親而使之令其畏威懷惠在茲一舉既至馬邑帝與仁恭兩軍兵馬不越五千餘人仁恭以兵少甚懼帝知其意因謂之曰突厥所長惟恃騎射見利即前知難便走風馳電卷不恆其陳以弓矢爲爪牙以甲冑爲常服隊不列行營無定所逐水草爲居室以羊馬爲軍糧勝止求財敗無慙色無警夜巡晝之勞無構壘餉糧之費中國兵行皆反于是與之角戰罕能立功今若同其所爲習其所好彼知無利自然不來當

今聖主在遠。孤城絕援。若不決戰。難以圖存。仁恭以帝隋室之近親。言而詣理。聽帝所爲。不敢違異。乃簡使能騎射者二千餘人。飲食居止。一同突厥。隨逐水草。遠置斥堠。每逢突厥候騎。旁若無人。馳騁射獵。以曜威武。帝尤善射。每見走獸飛禽。發無不中。嘗卒與突厥相遇。驍銳者爲別隊。皆令持滿。以伺其便。突厥每見帝兵。咸謂以其所爲。疑其部落有引帝而戰者。常不敢當。辟易而去。如此再三。衆心乃安。咸思奮擊。帝知衆欲決戰。突厥畏威。後與相逢。縱兵擊而大破之。獲其特勤所乘駿馬。斬首數百千級。自爾厥後。突厥喪膽。深服帝之能兵。收其所部。不敢南入。時有賊帥王漫天。別黨衆逾數萬。自號歷山飛。結營於太原之南境。上黨、西河、京都道路斷絕。煬帝後十三年。勑帝爲太原留守。仍遣獸唐諱虎字資郎將王威。獸牙郎將高君雅爲副。帝遂私竊喜甚。而謂第二子秦王等曰。唐固吾國。太原卽其地焉。今我來斯。是爲天與。與而不取。禍將斯及。然歷山飛不破。突厥不和。無以經邦濟時也。旣而歷山飛衆數不少。劫掠多年。巧於攻城。勇於力戰。南侵上黨。已破將軍慕容。將軍羅侯之。兵北寇太原。又斬將軍潘長文。首頻勝兩將。所向無前。於是帝率王威等。及河東太原兵馬。往討之。於河西雀鼠谷口。與賊相遇。賊衆二萬餘人。帝時所統步騎。纔五六千而已。威及三軍。咸有懼色。帝笑而謂威等曰。此輩羣盜。惟財是視。頻恃再勝。自許萬全。鬪力而取。容未能克。以智圖之。事無不果。所憂不戰。戰必破之。幸無憂也。須臾。賊陣齊來。十許里間。首尾相繼。去帝漸近。帝乃分所將兵爲二陣。以羸兵居中。多張幡幟。盡以幡重繼後。從旌旗鼓角。以爲大陣。又以麾下精兵數百騎。分置左右隊。爲小陣。軍中莫識所爲。及戰。帝遣王威領大陣。居前。旌旗從。賊衆遙看。謂爲帝。

之所在。乃帥精銳競來赴威。及見轎駕。捨鞍爭取。威怖而落馬。從者挽而得脫。帝引小陣左右二隊。大呼而前。夾而射之。賊衆大亂。因而縱擊。所向摧陷。斬級獲生。不可勝數。而餘賊黨老幼男女數萬人。並來降附。於是郡境無虞。年穀豐稔。成帝恩德。若充陽之逢春雨馬。後突厥知帝已還太原。仁恭獨留無援。數使馬邑。帝遣副留守高君雅將兵與仁恭共力拒之。仁恭等遠帝指蹤。遂爲突厥所敗。旣而隋主遠聞。以帝與仁恭不時捕虜。縱爲邊患。遂遣司直馳驛繫帝而斬仁恭。帝自以姓名著於圖錄。太原王者所在。虛被猜忌。因而禍及。頗有所晦。時皇太子在河東。獨有秦王侍側耳。謂王曰。隋曆將盡。吾家繼膺符命。不早起兵。者。顧爾兄弟未集耳。今遭姜里之厄。爾昆季須會盟津之師。不得同受孥戮。家破身亡。爲英雄所笑。王泣而啓帝曰。芒碭山澤是處容人。請同漢祖以觀時變。帝曰。今遇時來。逢茲鉅摯。雖覩機變。何能爲也。然天命有在。吾應會昌。未必不以此相啓。今吾勵謹。常敬天之誠。以卜興亡。自天祐吾。彼焉能害。天必亡我。何所逃刑。爾後數日。果有詔使馳驛而至。釋帝而免仁恭。各依舊檢校所部。煬帝之幸江都也。所在路絕。兵馬討掩來往不通。信使行人無能自達。惟有使自江都至于太原。不逢劫掠。依程而至。衆咸異焉。初。使以夜至太原。溫顏將宿於城西門樓上。首先見之。喜其亟速。報兄彥弘馳以啟帝。帝時方臥。聞而驚起。執彥弘手而笑曰。此後餘年。皆爲天假。退謂秦王曰。吾聞惟神也。不行而至。不疾而遠。此使之行可謂神也。天其以此使促吾。當見機而作。雄斷英尋。從此遂定。帝素懷濟世之略。有經綸天下之心。接待人倫。不限貴賤。一面相遇。十數年不忘。山川衝要。一覽便憶。遠近承風。咸思託附。仍命皇太子於河東潛結謀。授秦

王於晉陽密招豪友太子及王俱稟聖略傾財賑施卑身下士逮乎鬻繪博徒監門廝養一技可稱一藝可取與之抗禮未嘗云倦故得士庶之心無不至者十三年歲在丁亥正月丙子夜晉陽宮西北有光夜明自地屬天若大燒火飛焰炎赫正當城西龍山上直指西南極望竟天俄而山上當童子寺左右有紫氣如虹橫絕火中上衝北斗自一更至三更而滅城上守更人咸見而莫能辨之皆不敢道大業初帝爲樓煩郡守時有望氣者云西北乾門有天子氣連太原甚盛故隋主於樓煩置宮以其地當東都西北因過太原取龍山風俗道行幸以厭之云後又拜代王爲郡守以厭之二月己丑馬邑軍人劉武周殺太守王仁恭據其郡而自稱天子國號定楊武周竊知煬帝於樓煩築宮厭當時之意故稱天子規以應之帝聞而歎曰頃來羣盜遍于天下攻略郡縣未有自謂王侯者焉而武周豎子生於塞上一朝歛起輕竊大名可謂陳涉孤鳴爲沛公駁除者也然甚欲因此起兵難于先發私謂王威高君雅等曰武周雖無所能僭稱尊號脫其進入汾源宮我輩不能翦除並當滅族矣雅大懼固請集兵帝察威等情切謬謂之曰待據樓煩可微爲之備宜示寬閑以寧所部三月丁卯武周南破樓煩郡進據汾源宮帝謂官僚曰兵可戒嚴城可守備糧可賑給三者當今廢一不可須預部分惟諸公斷之威等計無所出拜而請帝曰今日太原士庶之命懸在明公公以爲辭孰能預此帝知衆情歸已乃更從容謂之曰朝廷命將出師皆稟節度未有閫外敢得專之賊據離宮自稱天子威福賞罰隨機相時以此攻城何城不克汾源去此數百里間江都懸隔三千餘里關河襟帶他賊據之聞奏往來還期莫測以嬰城膠柱之兵當巨猾豕突之勢諧文

人以救火。其可撲滅乎。公等國之爪牙。心如鐵石。欲同戮力。以除國難。公家之利。見則須爲。俾其無猜。期于報効。所以詢議擇善行之。是非憚於治兵。敢辭戎首。威等對曰。公之明略。遠近備知。地在親賢。與國休戚。公不竭力。誰盡丹誠。若更逡巡。羣情疑駭。帝若不得已而從之。衆皆悅服。懼而聽命。帝以王威兼任太原郡丞。爲人清恕。令與晉陽宮監裴寂。相知檢校倉糧。賑給軍戶口。高君雅當守高陽。得無失脫。遣巡行城池。及捍禦器械。以兵馬鎧仗戰守事機。召募勸賞。軍民徵發。皆須決於帝。太原左近聞帝部分募兵備邊。所在影赴。旬日之頃。少長得數千人。兵司總帳以聞。請安營處。帝指興國寺曰。勤王之師。不謀而至。此其興國者焉。宜于此寺安處。恐威雅猜覺。亦不之間。私謂秦王等曰。紀綱三千足成霸業。處之興國。可謂嘉名。仍遣密使往蒲州。催追皇太子等。是月也。朔方郡人梁師都。又殺郡官而稱天子。初。帝遣獸牙郎將高君雅。與馬邑守王仁恭。防遏突厥。雅違帝旨。失利而還。帝恐煬帝有責。便欲據法繩雅。雅是煬帝舊左右。慮被猜嫌。忍而弗問。雅性庸很。不知慙屈。帝甚得太原內外人心。瞻仰龍顏。疑有異志。每與王威密伺帝隙。有鄉長劉龍者。晉陽之富人也。先與宮監裴寂引之謁帝。帝雖知其微細。亦接待之。以招客。君雅又與龍相善。龍感帝恩。矯知雅等密意。具以啓聞。帝謂龍曰。此輩下愚。閑于時事。同惡違衆。必自斃也。然卿能相報。深有至誠。幸勿有多言。我爲之所。夏五月癸亥夜。帝遣長孫順德、趙文恪等率興國寺所集兵五百人。總取秦王部分。伏于晉陽宮城東門之左。以自備。甲子旦。命晉陽縣令劉文靜。導開陽府司馬劉正會。辭告高君雅、王威等。與北蕃私通。引突厥南寇。帝集文武官僚。收威等繫獄。丙寅。而突厥數萬騎。

抄逼太原。人自羅郭北門，取東門而出。帝分命裴寂、文靜等守備諸門，並令大開不得輒閉。而城上不張旗幟。守城之人不許一人外看，亦不得高聲。示以不測，衆咸莫知所以。仍遣首賊帥王康達率其所部千餘人與志節府應揚郎將楊毛等潛往北門隱處設伏。誠之待突厥過盡，抄其馬羣，擬充軍用。然突厥多帝登宮城東南樓望之，且及日中，騎塵不止。康達所部，並是驍銳，勇于抄劫。日可食時，謂賊過盡，出抄其馬，突厥前後夾擊，埃及漲天。逼臨汾河，康達等既無出力，並墜汾而死。唯楊毛等一二百人浮而得脫。城內兵數無幾，已喪千人。軍民見此勢，私有危懼。皆疑王威君雅召而至焉，恨之愈切。帝神色自若，懼甚于常。頗謂官僚曰：「當今天下賊盜十室而九。稱帝圖王，專城據郡，孤荷文皇殊寵，思報厚恩，欲與諸賢立功。」王室適欲起兵，威雅沮衆，深相猜忌，密構異謀，欲加之罪。疑其私通境外，豈謂繫之二日。甲子是十五日，丙寅是十七日。突厥果入太原，此殆天心爲孤罰罪，非天意也。何從而至？天旣爲孤遣來，還應爲孤令去。彼若不去，當爲諸軍遣之，無爲慮也。帝以見兵未多，又失康達之輩，戰則衆寡非敵，緩恐入掠城外居民，夜設伏兵出城，以據險要，曉令他道而入。若有來援，仍誠出城將士，遙見突厥，則速據險，勿與共戰。若知其戰去，必莫追之。但送出境而還，使之莫測。爾後再宿，突厥達官自相謂曰：「唐公相貌有異，舉止不凡，智勇過人，天所與者。前來馬邑，我等已大畏之。今在太原，何可當也？」且我輩無故遠來，他又不與我戰，開門待我，我不能入，久而不去，天必瞋我。我以唐公爲人，復得天意，出兵要我，盡死不疑。不如早去，無住取死。己亥夜潛遁，明旦城外覩人馳報。帝曰：「我知之矣。」文武官入賀。帝曰：「且莫相賀。當爲諸官召而使之，卽立自手疏與突厥書。」

曰何所聞而來何所見而去自去自來豈非天所爲也我知天意故不遣汝知天意亦須同我當今隋國喪亂蒼生困窶若不救濟總爲上天所責我今大舉義兵欲寧天下遠迎主上還其突厥和親更似開皇之時豈非好事且今日陛下雖失可汗之意可汗寧忘高祖之恩也若能從我不侵百姓征伐所得子女玉帛皆可汗有之必以路遠不能深入見與和通坐受寶玩不勞兵馬亦任可汗一二便宜任量取中仍命封題署云某啓所司報請云突厥不識文字惟重貨財願加厚遺改啓爲書帝笑而謂請者曰何不達之深也自頃離亂亡命甚多走胡奔越書生不少中國之禮併在諸夷我若敬之彼仍未信如有輕慢猜慮愈深古人云屈于一人之下伸于萬人之上塞外羣胡何比擬凡庸之一耳且啓之一字未直千金千金尙欲與之一字何容有愴此非卿等所及迺遣使者馳驛送啓始畢得書大喜其部達官等曰我知道唐公非常人也果作異常之事隋主前在鴈門人馬甚衆我輩攻之竟不敢出太原兵到我等投之若神皆走還也天將以太原與唐公必當平定天下不如從之以求寶物但唐公欲迎隋主共我和好此語不好我不能從隋主爲人我所知悉若迎來也卽忌唐公於我舊怨決相誅伐唐公以此喚我我不能去唐公自作天子我則從行覓大勳賞不避時熱當日卽以此意作書報帝使人往還不踰七日使至前日所賀官僚舞蹈稱慶帝聞書歎息久之曰非有天命此胡寧豈如此但孤爲人臣須盡節主憂臣辱當未立功欲舉義兵欲戴王室大名自署長惡無君可謂隋亂之人非復尊隋之事本虛兵行以後突厥南侵屈節連和以安居者不謂今日所報更相要逼乍可絕好蕃夷無有從其所勸突厥之報帝書也謂使人曰

唐公若從我語。卽宜急報。我遣大達官往取進止。官僚等以帝辭色凜然。莫敢咨諫。興國寺兵知帝未從突厥所請。往往偶語曰。公若更不從突厥。我亦不能從公。裴寂、劉文靜等知此議。以狀啓聞。帝作色曰。公等並是隋臣。方來共事。以此勸孤臣節。安在。裴寂等對曰。儻使伊呂得盡誠于桀紂。卽不爲湯武之臣。寂等改以事君。不敢拘于小節。且今士衆已集。所乏者馬。蕃人未是急須胡馬。待之如渴。若更遲留。恐其有悔。帝曰。事不師古。鮮能克成。諸賢宜更三思。以謀其次。六月己卯。太子與齊王至自河東。帝懼甚。裴寂等乃因太子秦王等入啓。請依伊尹放太甲。霍光廢昌邑故事。廢皇帝而立代王。興義兵以檄郡縣。改旗幟。以示突厥。師出有名。以輯夷夏。帝曰。如此所作。可謂掩耳盜鍾。事機相迫。不得不爾。雖失意于後主。幸未負于先帝。衆議既同。孤何能易。所恨元首叢脞。股肱墮哉。歎歎不得已。裴寂等曰。文皇傳嗣。後主假權。楊素亡國喪家。其來漸矣。民怨神怒。降茲禍亂。致天之罰。理亦其宜。於是遣使以衆議馳報突厥。始畢。依旨卽遣其柱國康鞞利級失熱寒特勤達官等送馬千疋來太原交市。仍許遣兵送帝往西京。多少惟命。康鞞利將至。軍司以兵起甲子之日。又符讖尚白。請建武王所執白旗。以示突厥。帝曰。誅紂之旗。牧野臨時所仗。未入西郊。無容預執。宜兼以絳雜半續之。諸軍稍旃皆放此。營壁城壘。幡旗四合。赤白相映若花園。開皇初。太原童謠云。法律存。道德在。白旗天子出東海。常亦云白衣天子。故隋主恆服白衣。每向江都擬于東海。常修律令。筆削不停。并以綵畫五級木壇。自隨以事道。又有桃李子歌曰。桃李子。莫浪語。黃鵠繞山飛。宛轉花園裏。案李爲國姓。桃當作陶。若言陶唐也。配李而言。故云桃花園宛轉屬旌幡。汾晉老幼謳。

謫在耳。忽覩靈驗。不勝懼躍。帝每顧旗幡。笑而言曰。花園可爾。不知黃鵠如何。吾當一舉千里。以符冥識。自爾已後。義兵日有千餘集焉。二旬之間。衆得數萬。裴寂等啓曰。義軍漸大。宜有司存官僚所統。須有肆屬。帝曰。布衣之士。或假名竊位。孤實將軍。居唐大宇。近捨于此。更欲何求。裴寂等請進位大將軍。以降府號。不乖古今。權藉威名。帝曰。卿以二立相期。欲孤爲霍光之任。威在將軍。何關大也。必須仍舊。亦任加之。署置府僚長史已下。功次取之。量能受職。裴寂等又請置諸軍并兵士等總號。帝曰。諸侯二軍春秋所許。孤今霸業。差擬晉文。可作三軍。分置左右。謀簡統帥。妙選其人。諸軍既是義兵。還可呼爲義士。昔周武克殷。義士非其薄德。况今未有所克。敢忘義士者乎。太原遼山縣令高斌廉。拒不從命。仍遣使間行往江都。奏帝舉兵。煬帝惡李氏。據有太原。聞而甚懼。乃勅東都西京嚴爲備禦。河西不時送歟。帝曰。遼山守株。未足爲慮。西河繞山之路。當吾行道。不得留之。六月甲申。乃命大郎二郎率衆取之。除程命費三日之糧。時文武官人。並未署置。軍中以次第呼太子秦王爲大郎二郎焉。臨行。帝語二兒曰。爾等少年。未之更事。先以此郡觀爾所爲。人具爾瞻。咸宜勉力。大郎二郎跪而對曰。兒等早蒙弘訓。稟教義方。奉以周旋。不敢失墜。家國之事。忠孝在焉。故從嚴令。事須稱旨。如或有違。請先軍法。帝曰。爾曹能爾。吾復何憂。于時義師初會。未經講閱。大郎等慮其不攻。以軍法爲言。三軍聞者。人皆自肅。兵向西河。大郎二郎在路。一同義士。等其甘苦。齊其休息。風塵警急。身卽前行。民間近道。果菜已上。非買不食。義士有竊取者。卽遺求主爲還價。亦不詰所竊之人。路左有長老。或進蔬食壺漿者。重傷其意。非其所見。軍人等同分。未嘗獨受。如有牛酒。

饋遺。案興來者勞而遣之曰。此隋法也。吾不敢頗虛前人有限。遂爲終日不食以謝之。於是將士見而感悅。人百其勇。至西河城下。大郎二郎不甲親往喻之。城外欲入城人無問男女小大。並皆放入城內。旣見義軍寬容至此。咸思奔赴。唯有郡丞高德儒執迷不反。已丑。以兵臨之。飛梯纔進。衆皆爭上。郡司法書佐朱知瑾等從城上引兵而入。執德儒以送軍門。德儒卽隋之見讒人也。大郎二郎等數之曰。卿逢野鳥。謬道見讒。佞惑隋侯。以爲祥瑞。趙高指鹿爲馬。何相似哉。義兵今獎王室。理無不殺。趙高之輩。仍命斬焉。自外不戮一人。秋毫不犯。往還九日。西河遂定。師歸。帝聞喜曰。以此用兵天下。橫行可也。是日。卽定入關之策。癸巳。以世子爲隴西公。爲左領軍大都督。左三統軍等隸焉。二郎爲燉煌公。爲右領軍大都督。右三統軍等隸焉。世子乃爲太原郡守。命裴寂、劉文靜爲大將軍府長史司馬。以殷開山、劉正會、溫大雅、唐儉、權弘壽、盧階、思德平、武士彠等爲掾屬記室參左等官。以鷹揚王長階、姜寶誼、揚毛、京兆長孫順德、竇琮、劉弘基等分爲左右統軍副統軍。自外文武職員。隨才詮用。其平旦有僧俗姓李氏。獲白雀而獻之。至日未時。又有白雀來止帝牙前樹上。左右復捕獲焉。明旦有紫雲見于天。當帝所坐處。移時不去。旣而欲散。變爲五色。皆若龍獸之象。如此三朝。百姓咸見。文武謁賀。帝皆抑而不受。丙申。突厥柱國康鞘利等并馬而至。舍之於城東興國玄壇。鞘利見老君尊容。皆拜。道士賈昂見而謂同郡溫彥將曰。突厥來詣唐公。而先謁老君。可謂不失尊卑之次。非天所遣。此罪寧知禮乎。丁酉。帝引康鞘利等。禮見於晉陽宮東門之側舍。受始畢所送書信。帝爲貌恭厚。加饗賄。鞘利等大悅。退相謂曰。唐公見我蕃人。尙能屈意。見諸華夏。情何

可論。敬人者，人皆敬愛。天下敬愛，必爲人主。我等見之人，不覺自敬。從此以後，帝每見鞞利等，愈加敬畏，不失藩臣之禮。其馬千疋，唯市好者而取其半。義士等咸自出物，請悉買之。帝曰：「彼馬如羊，方來不已。吾恐爾輩不能買之。」胡人貪利無厭，其欲少買，且以見貧，示其非急於馬。吾當共之，貢市不用爾物，毋爲迫役。自費家財，已而高陽郡靈壽賊帥鄒士陵，以其黨數千人款附，卽授鎮東將軍，封燕郡公，仍置鎮東府，具補僚屬，以招撫山東郡縣。乙巳，康鞞利等還蕃，乃命司馬劉文靜報使，並取其兵。靜辭，帝私諭之曰：「胡兵相送，天所遣來，敬煩天心，欲存民命，突厥多來，民無存理，數百之外，無所用之所防之者。恐武周引爲邊患，又胡馬收放，不煩粟草，取其聲勢，以懷遠人，公宜體之，不須多也。」

大唐創業起居注卷二

起自太原至京城凡一百二十六日

秋七月壬子以四郎元吉爲太原郡守留守晉陽宮文武後事並委焉義師欲西入關移營於武德南癸丑將引帝立軍門仗白旗而大號誓衆文曰夫天地定位否泰迭其盛衰日月著明虧戾貶其貞滿惟神莫測尙乃盈虛矧茲王道能無悔恠克先帝世炎漢商周撥亂乘乾多歷年所厥嗣墜緒時屬艱危則其股肱宰衡藩屏親戚戮力同獎推心翼戴頗或可扶糾合而奔官守惡不可救廢放而安宗社伊霍桓文並其人也率爾踵武代有其事布在方策可得而言日者蒼精云謝炎運將啓上天眷命屬乎隋室於是
我高祖文皇帝以后父之尊周親入相豹變陝左龍飛漢東誅尉迥於韓魏則神鋌遐響勦王謙於巴蜀則靈山斯鏤四罪咸服九有樂推經綸帷幄之間揖讓巖廊之內造我區夏不更朞月舜禹以來受終未有如斯之易者以故臨朝恭已庶績爲心親覽萬機平章百姓兢兢慎于馭朽翼翼懼於烹鮮齊六合爲一家等黔黎于赤子有陳不率殄虐政於江湖獫醜相屠降封虜于沙漠其吊民也如彼其和戎也若茲散馬牛於山林鑄劍戟爲農器求瘼恤隱訟息刑清輕徭薄賦家給人足倉庫流衍于里閭職貢委輸于帑藏豈獨水衡貫朽常平粟紅而已哉加以愛民治國節用而敦本深根固蒂因河而踐華肆觀朝宗止於京邑玄覽縱觀弗踰岐下遐邇叶和內外禔福凱澤洋溢休祥紹至一世之氓咸賴仁壽二紀之治可

謂隆揚推往初歷選前辟詩書所美莫之能尙然聖人千慮失於知子以正萬國輕易元良廢守器之長立不才之庶兆亂之萌於是乎在異哉今上之行已也獨智自賢安忍忌刻拓狂悖爲混沌苟鳩毒爲态唯餚非好佞拒諫信讒敵怨誠良仇離骨肉巡幸無度窮兵極武喜怒不恆親離衆叛御河導洛肆舳艤而達江馳道緣邊徑長城而傍海離宮別館之所在車撤馬跡之所向咸塹山而陁谷畢結瑤而構瓊遼水屢征殲丁壯於億兆伊谷轉輸敵老幼於百萬禽荒磬於飛走蠶食窮於水陸征稅盡於重歛民力殫於勞止十分天下九爲盜賊荆棘旅于闕廷猶狼充於道路帶牛佩犧輟耕者連孤竹而寇潢池鋤耰棘矜大呼者聚蘋蒲而起芒澤青羌白狄剽夷道而口口黃巾赤眉屠閭左而竊號曝骸如莽僵尸若麻敵國滿畫鵠之舟胡越繞和蠻之轂四海波振而冰泮五嶽塵飛而土崩踞積薪以待然鉗衆口而寄坐明明皇祖貽厥無人赫赫宗隋滅爲亡國某以庸虛謬蒙嘉惠承七葉之餘慶資五世之克昌遂得地臣戚里家稱公室典驍衛之禁兵守封唐之大宇義無坐觀綴旒之絕不舉勤王之師苟利社稷專之可也廢昏立明敢遵故實今便興甲晉陽奉尊代邸掃定成雒集寧寓縣放後主于江都復先帝之鴻緒固配天子圓寢存司牧于蒼生豈謂一朝言及於此事不獲已追增感歎凡厥士民義旅豪傑敏究時難曉達權謀家怨國恥孰乎今日從我同盟無爲貳志有渝此盟神其殛之仍命以此誓辭檄喻所在郡縣并命檄書勿得因循妄論軍勢帝性簡質大度豁如前代自矜遠嫌之事皆以恕實行之不爲欺結自然反經合義妙盡機權類皆如此其義士等各以名到先後爲次第汎加宣惠綏德二尉官帝謂行之等曰吾未